



Sarajevo, 22.10.2025. godine

MEDIJIMA

SAOPĆENJE ZA MEDIJE

Održan deveti sastanak Pododbora za inovacije, informaciono društvo i socijalnu politiku između EU i BiH

Na devetom sastanku Pododbora za inovacije, informaciono društvo i socijalnu politiku između Evropske unije i Bosne i Hercegovine, koji je održan 22. oktobra 2025. godine u online formatu, članovi dvije delegacije su razmijenili informacije o aktivnostima na realizaciji preporuka Evropske komisije i obavezama koje BiH treba ispuniti u narednom periodu, posebno nakon dostavljanja Reformske agende.

Predstavnici Evropske komisije su pozdravili pristupanje BiH programu Evropske unije *Digitalna Evropa* i izrazili očekivanja da će uskoro biti usvojen zakonodavni okvir u oblasti informacionog društva, koji će biti usklađen s pravnom stečevinom EU.

Potrebno je usvojiti Zakon o elektronskom identitetu i uslugama povjerenja za elektronske transakcije, Zakon o elektronskim komunikacijama i elektronskim medijima, kao i zakonodavstvo o transparentnosti vlasništva nad medijima. Evropska komisija je pozvala bh. vlasti da usvoje strategiju *cyber* sigurnosti na državnom nivou, imenuju nadležna državna tijela, jedinstvenu kontakt tačku i timove za hitne kompjuterske intervencije u slučajevima sigurnosnih incidenata, kao i strateški okvir za pristup širokopojasnoj mreži.

Na sastanku se razgovaralo i o uspostavi Korporacije javnih emitera (PBS), kao zajedničkog tijela za sva tri javna RTV emitera u BiH, finansijskoj održivosti, političkoj neutralnosti i nezavisnosti sistema javnih emitera i o upravnim odborima javnih emitera, koji moraju biti politički neutralni i nezavisni, kao i Regulatorna agencije za komunikacije BiH. Jedna od tema je bila i uvođenje broja za hitne slučajeve 112 u cijeloj zemlji.

Evropska komisija je preporučila BiH da usvoji strategiju zapošljavanja na nivou cijele države, ojača mehanizme koordinacije u vezi s politikama zapošljavanja i izradi Plan implementacije Garancije za mlade, u skladu s modelom i smjernicama EU. Članovi dvije delegacije su razmijenili informacije o trenutnom stanju na tržištu rada u BiH i kretanju radne snage, te o jačanju kapaciteta javnih službi za zapošljavanje, kako bi se omogućio efikasan prelaz ka podršci nezaposlenima. Potrebno je preduzeti konkretne mjere s ciljem smanjenja neformalnog zapošljavanja, unaprijediti procedure praćenja i evaluacije mjera na tržištu rada, završiti oslobađanje javnih službi za zapošljavanje od administrativnih dužnosti vezanih za zdravstveno osiguranje i druge socijalne beneficije te povećati naknade za nezaposlenost i socijalna davanja na osnovu potreba.

Preporuka Evropske komisije je usvajanje mjera za smanjenje neformalne zaposlenosti, razvijanje sistema za praćenje i predviđanje potrebnih vještina na tržištu rada i saradnja sa

socijalnim partnerima na promociji efikasnog socijalnog dijaloga. Među prioritetima su i nastavak rada na implementaciji standarda rodne ravnopravnosti, implementacija Smjernica Komisije o nezavisnom životu i inkluziji osoba s invaliditetom i uvođenje jedinstvenog minimalnog nivoa naknada i zaštite za porodijsko odsustvo u cijeloj državi. BiH, također, mora poduzeti dodatne mjere za smanjenje diskriminacije po osnovu spola i nastaviti rad na implementaciji Akcionog plana za socijalnu inkluziju Roma.

Predstavnici Evropske komisije su ohrabрили bh. vlasti da osiguraju učešće cijele zemlje u budućim međunarodnim standardizovanim testovima za procjenu učinaka u obrazovanju i implementiraju mjere na osnovu nalaza PISA 2018 i TIMSS 2019. Sve obrazovne vlasti u BiH, u saradnji s Ministarstvom civilnih poslova, trebaju osigurati jednak i nediskriminatoran pristup obrazovanju, te dovršiti zakonodavni i strateški okvir za predškolsko, stručno i obrazovanje odraslih, osiguravajući potrebnu harmonizaciju zakonodavstva između svih nivoa vlasti, kao i uspostaviti standarde kvalifikacija i zanimanja za osnovne i digitalne kompetencije u okviru inicijalne obuke nastavnika.

Od BiH se očekuje i da uspostavi krovnu organizaciju Vijeća mladih na državnom nivou, koja uključuje tri postojeća vijeća mladih, i poduzme potrebne korake za trajno rješavanje pitanja pravnog statusa i finansiranja sedam kulturnih institucija od značaja za BiH. Evropska komisija je pozdravila napredak u oblasti visokog obrazovanja i naglasila da sistem (re)akreditacije visokoškolskih ustanova i studijskih programa širom zemlje mora biti potpuno funkcionalan, a saradnja između akreditacijskih agencija i drugih relevantnih aktera u BiH ojačana. Potrebno je promovisati i podržavati povećano učešće BiH u programu *Erasmus+ 2021-2027.*, u potpunosti iskoristiti program *Kreativna Evropa* i informisati potencijalne aplikante o prilikama koje pruža, te nastaviti saradnju s međunarodnim partnerima.

Na sastanku se razgovaralo i o pozitivnim kretanjima u oblasti istraživanja i inovacija, uspostavi Državne istraživačke i obrazovne mreže, jačanju inovacijskih napora u okviru Stuba III programa *Horizon Europe*, finalizaciji i usvajanju Strategije pametne specijalizacije na državnom nivou i strategije i akcionog plana za razvoj nauke za period 2023-2028.

Devetim sastankom Pododbora za inovacije, informaciono društvo i socijalnu politiku između Evropske unije i Bosne i Hercegovine kopredsjedavali su pomoćnik ministrice u Ministarstvu civilnih poslova BiH Adnan Husić i Barbara Jesus - Gimeno, šefica jedinice Evropske komisije za Crnu Goru i Bosnu i Hercegovinu.

Direkcija za evropske integracije